

**Евгений Михайлович Алексеев**

Коми Республикаса Юралысьлөн 2022 во моз тӧлысь 5 лунся 89 №-а Индӧдӧн сетӧма «Почёта гражданин» Коми Республикаса медвылыс почёт ним.

Чужис 1934 вося ӧшым тӧлысь 29 лунӧ Коми АССР-ын Емдін районса Межӧг сиктын.

1953 воӧ помаліс Микуньса 1 №-а кӧрт туй училище.

1953 восянь 1971 воӧдз уджаліс Микуньын локомотивнӧй депоын.

1955 – 1959 воясӧ служитіс Саридзвыв Военнӧй флотын. Выль сикас атомнӧй да водороднӧй ӧружельысь испытаниеяс буре нудӧмысь 1958 воын сылы сетісны Ленин орден.

1971 воӧ Е.М. Алексеевӧс бӧрйисны Микунь карын Уджалысьясысь бӧрйӧм депутатяслӧн сӧветса исполкомӧн веськӧдлысьӧн, а 1975 воын – индісны Вуктыл районын Войтырысь бӧрйӧм депутатяслӧн сӧветса исполкомӧн веськӧдлысьӧн. Сылӧн юрнуӧдігӧн Микунь да Вуктыл карьяс ёна вежсисны-бурмисны: стрӧитісны-дзоньталісны туйяс, олан керкаяс, социальнӧй объектяс.

1978 восянь 1990 воӧдз Евгений Михайлович уджаліс Ухта карса исполкомын оланін да коммунальнӧй овмӧс серти веськӧдлысьӧс вежысьӧн. Сылӧн юрнуӧдігӧн карын бурмӧдісны оланін да коммунальнӧй юкӧнын уджсӧ, бырӧдісны Ухта бурмӧдӧм-мичмӧдӧм серти уна мытшӧд.

1990 воӧ Е.М. Алексеевлӧн водзмӧстчӧмӧн да зільӧмӧн Ухтаын заводитіс уджавны «Горзеленхоз» предприятие, кӧні Евгений Михайлович директораліс сійӧс востӧмсяньыс 2007 воӧдз. Сылӧн юрнуӧдігӧн «Горзеленхоз» вӧлі медбур муниципальнӧй учреждениеясысь ӧтиӧн, унаысь вермыліс россияса конкурсьясын.

Евгений Михайлович Алексеев – йӧзкотыр олӧмын водзмӧстчысь. Сійӧс бӧрйылісны СССР-са 7-ысь бӧрьян Медвылыс Сӧветын Войтырлӧн сӧветса депутатӧн, Коми АССР-са 8-ысь бӧрьян Медвылыс Сӧветса депутатӧн.

Коми Республикалы бур вылӧ уна во чӧж зіля уджалӧмысь Евгений Михайловичлы сетісны уна сикас канму награда. Сылӧн эмӧсь «Коми АССР-са йӧзкостса овмӧсын нимӧдана уджалысь», «Россияса оланін да коммунальнӧй овмӧсын почёта уджалысь» нимьяс. Ухта кар сӧвмӧдӧмын ыджыд заслугаясысь сылы сетӧма «Ухта карса почёта гражданин» ним.